

## **UNIVERZITET U BIHAĆU**

Telefon/faks: 387 (0) 37 222-022

Adresa: Pape Ivana Pavla II 2/2,  
77000 Bihać

email: rektorat@unbi.ba



## **UNIVERSITY OF BIHAĆ**

Phone/fax: 387 (0) 37 222-022

Address: Pape Ivana Pavla II 2/2,  
77000 Bihać

email: rektorat@unbi.ba

## **SENAT**

### **Politika otvorenog pristupa istraživačkim infrastrukturama na Univerzitetu u Bihaću**

**Bihać, 2021.**

## Uvod

Razvoj Politike otvorenog pristupa istraživačkim infrastrukturama<sup>1</sup> na Univerzitetu u Bihaću predstavlja jednu od inicijativa Ureda za NIR i međunarodnu saradnju za razvoj institucionalne podrške naučno-istraživačkom radu na Univerzitetu. Nedostatak propisa o naučno-istraživačkom radu na Univerzitetu u Bihaću, odnosno Unsko-sanskom kantonu kao osnivaču Univerziteta u Bihaću, ali i oskudni propisi na nivou Bosne i Hercegovine, doveli su do potrebe da se razvije dokument koji će biti u skladu sa postojećim procedurama i zakonima, a koji bi univerzitetu omogućio pristup regionalnom i evropskom istraživačkom prostoru. Očekuje se da će novi uvidi u prakse drugih istraživačkih zajednica pomoći razvoju univerzitetskih i kantonalnih propisa vezanih za nauku i istraživanje. Otvoreni pristup istraživanjima kao generator razvoja nauke i istraživanja u Bosni i Hercegovini prepoznat je i u okviru Strategije razvoja nauke u Bosni i Hercegovini 2017-2022., koju je 2016. godine donijelo Vijeće ministara Bosne i Hercegovine.<sup>2</sup>

Opravdanost za razvoj Politike otvorenog pristupa na Univerzitetu u Bihaću jesu i određene globalne promjene, a posebno određene promjene unutar Evropske unije. Bosna i Hercegovina kao zemlja u razvoju ušla je u proces pristupanja članstvu Evropske unije. Ovo uključuje usklađivanje sa propisima Evropske unije u svim aspektima, uključujući i nauku i obrazovanje. Evropska unija je 2016. godine objavila Povelju otvorenog pristupa istraživačkim infrastrukturama koja, zajedno sa ostalim relevantnim inicijativama EU, ima za cilj da omogući *javni pristup rezultatima istraživanja koje financira javnost u cilju jačanja nauke i ekonomije zasnovane na znanju.*<sup>3</sup> Ovakva vrsta pristupa će istovremeno omogućiti financiranje istraživanja kroz fondove Evropske unije. S obzirom da je dio sredstava dostupan i Bosni i Hercegovini, potrebno je da istraživačke institucije i univerziteti prihvate politike otvorenog pristupa kako bi osigurale pravo pristupa finansiranju. Uz finansiranje koje je osnova za razvoj istraživanja, odlazak školovanog kadra predstavlja jedan od glavnih problema u Bosni i Hercegovini. Mladi i kvalifikovani istraživači napuštaju državu u potrazi za savremenijim istraživačkim centrima i univerzitetima. Usvajanjem Politike otvorenog pristupa istraživačkim infrastrukturama, Univerzitet u Bihaću ispunjava uvjete partnerstva i pristupa istraživačkim projektima koje finansiraju programi Evropske unije, te istovremeno pruža mogućnost razmjene znanja u cilju suzbijanja odlaska kvalifikovanog kadra.

Ovakva politika bi pomogla Univerzitetu u Bihaću da učvrsti svoj položaj i učešće u međunarodnom, a posebno evropskom naučno-istraživačkom prostoru kao svojevrsna realizacija posebnih interesa Univerziteta u Bihaću. Prioriteti Univerziteta jesu stvaranje prilika za intenzivni i usklađeni razvoj nauke i tehnologije, kao i uvjeta koji će potaknuti naučno istraživanje u funkciji tehnološkog, inovativnog, odnosno općeg društveno-ekonomskog razvoja, stvarajući osnovne principe koordinacije, usklađivanja planova, međunarodne saradnje, obrazovanja nove generacije naučnika, poboljšanja naučnog i tehnološkog sistema informacija, razvoja istraživačke infrastrukture prema međunarodnim standardima, povratak ulaganja u industrijska istraživanja, implementacije naučno-istraživačkih programa u skladu sa strategijama naučnog i tehnološkog razvoja Bosne i Hercegovine,

<sup>1</sup>Ova Polica je pripremljena uz tehničku pomoć Regionalnog Vijeća za kooperaciju u periodu juni-oktobar 2020., kao dio Programa podrške otvorenog pristupa istraživačkim infrastrukturama na Zapadnom Balkanu.

<sup>2</sup>[http://www.vijeceministara.gov.ba/akti/prijedlozi\\_zakona/?id=29798](http://www.vijeceministara.gov.ba/akti/prijedlozi_zakona/?id=29798)

<sup>3</sup><https://ec.europa.eu/research/openscience/index.cfm?pg=openaccess>

te u konačnici, jednak bitne implementacije aktivnosti koje bi popularizirale nauku i naučno-istraživački rad. Osim toga, Politika otvorenog pristupa istraživačkim infrastrukturama Bosne i Hercegovine na Univerzitetu u Bihaću bi trebala da uskladi viziju istraživačkog razvoja sa Evropskom poveljom za istraživanje i Smjernicama za angažman istraživača.<sup>4</sup>

Iako se postojeći zakoni Bosne i Hercegovine ne bave direktno Otvorenim pristupom istraživačkim infrastrukturama, pravna osnova za razvoj takve politike na Univerzitetu u Bihaću (u dalnjem tekstu UNBI) je sadržana u odredbama Zakona o visokom obrazovanju (Službeni glasnik BiH, br. 59/07), Okvirnom zakonu o osnovama naučno-istraživačke djelatnosti i koordinaciji unutrašnje i međunarodne naučno-istraživačke saradnje Bosne i Hercegovine (Službeni glasnik BiH, br. 43/09), Zakonu o visokom obrazovanju Unsko-sanskog kantona – prečišćeni tekst (Službeni glasnik USK, br. 24/17), Zakonu o Univerzitetu u Bihaću – prečišćeni tekst (Službeni glasnik USK, br. 24/17), Statutu Univerziteta u Bihaću broj 01-1914/09 od 27. oktobra 2009. godine i 06-7883/16 od 8. decembra 2016. godine, Pravilniku o procedurama za podršku međunarodnim aktivnostima Univerziteta u Bihaću broj 06-4295/11 od 29. septembra 2011. godine, Strategiji razvoja Univerziteta u Bihaću 2017-2022. godina i Strategiji internacionalizacije Univerziteta u Bihaću 2018-2023. godina, broj 06-6066-1/18 od 11. januara 2018. Svi navedeni zakoni i propisi (državni, kantonalni i propisi UNBI) imaju za cilj napredak naučnog istraživanja kroz promovisanje osnovnih principa i standarda u skladu sa međunarodnim dokumentima iz ove oblasti (u skladu sa Evropskom konvencijom za zaštitu ljudskih prava i osnovnih sloboda (ETS, br. 5, 1950) i njenim Protokolima, Preporukama istraživačkog zadatka Univerziteta (R (2000) 8), te drugim relevantnim konvencijama/sporazumima čiji je član Bosna i Hercegovina (u dalnjem tekstu BiH)).

Uzimajući u obzir prethodno spomenute razloge i okvirne propise za razvoj Politike otvorenog pristupa istraživačkim infrastrukturama na Univerzitetu u Bihaću, sljedeći racionalni ciljevi podupiru prihvatanje Politike:

1. Politika otvorenog pristupa istraživačkim infrastrukturama će omogućiti Univerzitetu da postane član Mreže otvorenih istraživačkih infrastruktura na Zapadnom Balkanu.
2. Članstvo u Mreži stvara nove prilike za uspostavu partnerstva u cilju mobilnosti istraživača.
3. Jasno razrađena Politika otvorenog pristupa vodi učinkovitijem iskorištavanju istraživačkih resursa Univerziteta u Bihaću. Učinkovitijim iskorištavanjem istraživačkih infrastruktura i partnerstva u istraživačkim projektima podiže se svijest Osnivača i drugih interesnih skupina u Unsko-sanskom kantonu i Univerzitetu u Bihaću o važnosti ulaganja u istraživački rad; prihvatanje Zakona o naučnom istraživanju u Unsko-sanskom kantonu, razvoj relevantnih propisa o istraživanju na Univerzitetu u Bihaću.
4. Postizanje navedenih ciljeva bi za rezultat imalo pomak sa lokalnog i nastavno orijentisanog Univerziteta prema globalnom i istraživački orijentisanom Univerzitetu; postizanje izvrsnosti u naučnom radu i istraživanju opravdava viziju Univerziteta u Bihaću o postizanju cilja vodećeg pokretača razvoja Unsko-sanskog kantona u područjima života i rada, ekonomije, obrazovanja, zdravlja, kulture i sporta.

<sup>4</sup>[https://euraxess.ec.europa.eu/sites/default/files/am509774cee\\_en\\_e4.pdf](https://euraxess.ec.europa.eu/sites/default/files/am509774cee_en_e4.pdf)

## POGLAVLJE 1 OPĆE ODREDBE I DEFINICIJE

1. Univerzitet u Bihaću (u dalnjem tekstu UNBI) je javna visokoškolska ustanova koju je osnovala Skupština Unsko-sanskog kantona 1997. godine u cilju provođenja visokog obrazovanja kroz tri ciklusa, te izvođenja naučno-istraživačkog rada u oblasti tehničkih, biotehničkih i društvenih nauka, te zdravstvenih i humanističkih nauka.
2. Ova Politika je primjenjiva na svu **Istraživačku infrastrukturu Univerziteta u Bihaću** u cilju otvorenog pristupa istraživanju i razvoju (IR) (tehničkog, društvenog i kulturno-istorijskog) (u dalnjem tekstu **Istraživačke infrastrukture**) te u cilju upravljanja odnosima između UNBI i Korisnika **Usluga otvorenog pristupa**.
3. Ova Politika čini sastavni dio bilo kojeg dijela sporazuma **Usluga otvorenog pristupa** koji je sklopljen između Univerziteta i **Korisnika Usluga otvorenog pristupa**.
4. Cilj ove Politike je da definiše prirodu **Istraživačkih infrastruktura**, njihove pozicije unutar ustanove visokog obrazovanja, njihovih tehničkih specifikacija, usluga koje pruža **Istraživačka infrastruktura**, odredbi o korištenju resursa, raspodjelu vremena, određivanju cijena pristupa, obaveze povjerljivosti i procedura rješavanja sporova.
5. Sljedeće definicije se koriste unutar Politike:
  - **Princip otvorenog pristupa** – uvjeti pod kojima institucije visokog obrazovanja pružaju pristup svojim Istraživačkim infrastrukturom na korištenje različitim **Korisnicima** unutar i izvan organizacije;
  - **Istraživačke infrastrukture (II)** (infrastrukture za provođenje istraživanja) – fizičke strukture (naučni instituti, laboratorijski, itd.), instrumenti, alati, te ostali materijali i virtualni resursi, povezane službe potrebne za izvođenje modernih fundamentalnih i primjenjenih naučnih istraživanja;
  - **Resursi** – istraživačke infrastrukture, naučnici i ostali istraživači koji su zaposleni na univerzitetu, osoblje koje pruža usluge unutar istraživačke infrastrukture, nadzire rad infrastrukture, radnici na održavanju infrastrukture;
  - **Usluge** – Usluge otvorenog pristupa koje je odobrio Rektor UNBI, Senat, Upravni odbor, Nastavno-naučno vijeće na fakultetima, kao i Dekan.
  - **Primalac Usluga otvorenog pristupa** – korisnik (interni ili eksterni) koji je prijavljen i kojem je odobren pristup Istraživačkoj infrastrukturi;
  - **Korisnik** – fizičko ili pravno lice koje je tražilo pristup uslugama ove istraživačke infrastrukture u cilju provođenja istraživanja;
  - **Vrijeme rada istraživačke infrastrukture** – ukupno vrijeme rada Istraživačke infrastrukture;
  - **Korisničko vrijeme** – vrijeme u kojem interni korisnici opreme koriste opremu za svoje istraživanje ili podučavanje, tokom kojeg opremu ne mogu koristiti drugi Korisnici;
  - **Vrijeme otvorenog pristupa** – vrijeme unutar kojeg su Istraživačke infrastrukture dostupne eksternim korisnicima za provođenje istraživanja, bilo besplatno ili uz novčanu naknadu;

- **Zagarantovano vrijeme** – vrijeme rezervisano za interne korisnike, ali i eksterne korisnike koji su prethodno tražili odobrenje za zagarantovano vrijeme u skladu sa procedurama definisanim u Poglavlju 4;
- **Komercijalno vrijeme** – vrijeme tokom kojeg je **Istraživačka infrastruktura** dostupna za neistraživačko korištenje, npr. komercijalno korištenje uz naknadu.

## **POGLAVLJE 2 UPRAVLJANJE ISTRAŽIVAČKIM INFRASTRUKTURAMA**

6. Upravljanje i nadzor nad **Istraživačkim infrastrukturom** osiguravaju: dekan, prodekan za NIR, te rukovodilac laboratorija i/ili rukovodilac instituta u skladu sa opisom zadataka za svako pojedinačno radno mjesto određeno u Pravilniku o unutrašnjoj organizaciji i sistematizaciji radnih mesta Univerziteta u Bihaću (2013).
7. **Dekani fakulteta** su neposredni nadređeni prodekanima za istraživanje i rukovodiocima laboratorija i/ili rukovodiocima instituta, te su direktno odgovorni za:
  - organizaciju predavanja i naučno-istraživačkog rada na fakultetu/univerzitetu, te provođenje mjera za njihovo unapređenje;
  - odlučivanje i odgovornost upotrebe sredstava dostupnih organizacionoj jedinici u skladu sa općim odredbama Univerziteta.
8. **Prodekan za naučno-istraživački rad**
  - prati postojeću situaciju i poduzima mjere za unapređenje opreme na fakultetu/univerzitetu, kao što su laboratorije, biblioteke, te ostala infrastruktura i oprema koja služi naučno-istraživačkom radu na fakultetu/univerzitetu,
  - postiže potrebnu/optimalnu saradnju sa Uredom za naučno-istraživački rad i međunarodnu saradnju, i drugim organizacionim i podorganizacionim jedinicama,
  - prati implementaciju istraživačkih i razvojnih projekata,
  - poduzima mjere za stručno usavršavanje nastavnika i saradnika na radnom mjestu u cilju postizanja novih i produbljivanja postojećih znanja kroz postdoktorske studije i druge oblike usavršavanja,
  - izvodi zadatke vezane za planiranje budžeta i planove nabavke.
9. **Rukovodilac laboratorija**
  - Upravlja i organizira poslove u laboratoriju,
  - prati raspored korištenja laboratorija,
  - nabavlja laboratorijski pribor i posuđe, hemikalije, te ostalu laboratorijsku opremu,
  - vodi izvještaj o upotrebi hemikalija i uvjetima laboratorijske opreme (amortizaciji, održavanju, kalibraciji),
  - prilaže mjesечni izvještaj o upotrebi laboratorija prodekanu fakulteta,
  - provodi laboratorijske analize,
  - organizira sistem upravljanja kvalitetom na nivou laboratorija,
  - prati nove standarde i regulacije iz područja laboratorijskih aktivnosti,
  - odgovoran je za pravilnu upotrebu i održavanje opreme,
  - pravi procjenu stanja laboratorija i laboratorijske opreme, te stepenu upotrebe opreme u naučnom podučavanju i IR-u,
  - učestvuje u pripremi izvještaja i studija o laboratorijskim uslugama,
  - radi na usvajanju novih metoda i tehnika laboratorijskog testiranja,
  - učestvuje u davanju mišljenja i interpretaciji rezultata laboratorijskih testiranja,
  - provodi konsultacije iz područja laboratorijskih aktivnosti.
10. **Rukovodilac instituta**
  - Vrši koordinaciju zadataka i radnih zadataka koji proizilaze iz osnovnih zadataka Instituta,
  - predlaže godišnji i operativni plan Instituta NNV fakulteta,
  - organizira pripremu ponuda i ugovora za izvođenje naučnih, istraživačkih, projektnih i drugih aktivnosti na Institutu,
  - prilaže izvještaj o poslovanju Instituta NNV fakulteta i Upravnom odboru Univerziteta,

- priprema podatke za ugovore sa klijentima i saradnicima,
- koordinira poslovima sa klijentima i korisnicima Instituta,
- potvrđuje dokumentaciju iz područja aktivnosti Instituta.

#### **11. Ured za NIR i međuuniverzitetsku saradnju**

- prijem zahtjeva eksternih korisnika za pristupanje istraživačkim infrastrukturama, te prosljedivanje zahtjeva Fakultetima,
- priprema dokumentacije i koordinacija procedura za odobrenje pristupa eksternalim korisnicima,
- komunikacija sa upravnim tijelima UNBI i Službom za ekonomsko financijske poslove u vezi finansiranja pristupa,
- vođenje evidencije i prijem izvještaja eksternih korisnika,
- povremeno izvještavanje upravnim tijelima UNBI o Otvorenom pristupu istraživačkim infrastrukturama eksternih korisnika, te prijedlog mjera za unapredjenje.

### **POGLAVLJE 3 KORISNICI ISTRAŽIVAČKIH INFRASTRUKTURA**

12. Usluge korištenja laboratorijske opreme su dostupne internim i eksternim korisnicima.
13. **Interni Korisnik** je zaposlenik ili student/ica Univerziteta u Bihaću, uključujući spoljne saradnike i studente na razmjeni.
14. **Eksterni Korisnik** je naučnik i istraživač sa drugih univerziteta/istraživačkih organizacija, predstavnik privrede, nevladine organizacije, korisnici i pojedinci iz vladinih organizacija.
15. Interni **Korisnik**, koji želi koristiti ili biti ovlašten za korištenje laboratorijske opreme, rezerviše potrebnu opremu službenim zahtjevom koji predaje na protokol Fakulteta. Rukovodilac laboratorija odobrava zahtjev.
16. Eksterni Korisnik, koji želi koristiti ili biti ovlašten za korištenje laboratorijske opreme se može prijaviti u Uredu za NIR i međuuniverzitetsku saradnju službenim zahtjevom pismeno ili putem elektronske pošte na [nir@unbi.ba](mailto:nir@unbi.ba).
17. Nakon što zaprimi zahtjev eksternog **Korisnika**, Ured za NIR i međuuniverzitetku saradnju prosljeđuje zahtjev relevantnom Fakultetu. Dekan i Rukovodilac laboratorija odobravaju zahtjev, te pripremaju ugovor za pristup **Istraživačkim infrastrukturom**.
18. Ugovor se zaključuje pismenim putem. Pregovori vezani za ugovor se mogu odvijati putem elektronske pošte, te stupaju na snagu u trenutku razmjene originalnog dokumenta.

## **POGLAVLJE 4 PRISTUP ISTRAŽIVAČKIM INFRASTRUKTURAMA**

19. **Istraživačka infrastruktura** je dostupna **Korisnicima** na korištenje u skladu sa procedurama definisanim **Vremenom pristupa Istraživačkoj infrastrukturi**.
20. **Vrijeme korištenja Istraživačke infrastrukture** je podijeljeno na **Korisničko vrijeme**, **Vrijeme otvorenog pristupa** i **Komercijalno vrijeme**.
21. **Korisničko vrijeme**, **Vrijeme otvorenog pristupa** i **Komercijalno vrijeme** mogu da čine **Zagarantovano vrijeme**, koje uključuje i Vrijeme otvorenog pristupa i Komercijalno vrijeme ukoliko su oba prethodno odobrena.
22. Rukovodilac laboratorija/Rukovodilac Instituta odobrava raspored za **Vrijeme korištenja Istraživačke infrastrukture**, uključujući dodjelu vremenskih termina zavisno od tipa korisnika, pod prepostavkom da je cilj postizanje ravnopravne raspodjele vremena među korisnicima.
23. Dekan fakulteta na prijedlog Rukovodioca laboratorija garantuje dodjelu od minimum 10% ukupnog godišnjeg radnog vremena **Istraživačke infrastrukture** eksternim **Korisnicima**, ukoliko za tim ima potrebe. Ostatak radnog vremena je rezervisan za interne **Korisnike** i ispunjavanje internih potreba, uključujući i organizaciju nastavnog procesa na organizacionim jedinicama Univerziteta u Bihaću.
24. Usluge **Istraživačke infrastrukture** se prioritetno pružaju internalim **Korisnicima** u slučaju da potražnja prevazilazi kvotu **Istraživačke infrastrukture** i srodnih usluga koje se pružaju eksternim **Korisnicima**.
25. Usluge **Istraživačke infrastrukture** koje se pružaju na osnovu pomenutih prioriteta moraju biti u skladu sa pravnim odredbama koje se tiču državne pomoći i pravila korištenja javnog financiranja iz različitih izvora.

## **POGLAVLJE 5 USPOSTAVA CJENOVNIKA USLUGA ISTRAŽIVAČKIH INFRASTRUKTURA**

26. Cjenovnik usluga **Istraživačke infrastrukture**, kao i upotreba zaprimljenih sredstava za pružanje usluga istraživačke infrastrukture biće regulisana posebnim dokumentima i odredbama koje donose upravljačka tijela Univerziteta, kao što su Upravni odbor i Senat.
27. Cjenovnik usluga **Istraživačke infrastrukture** utvrđuje se na osnovu tipa **Korisnika** – interni ili eksterni **Korisnik**/komercijalni ili nekomercijalni, procjenjujući vrijeme korištenja opreme i ljudskih resursa, potrošni materijal i ostale materijale potrebne za izvođenje poslova, te druge moguće troškove.
28. Razlika u cijenama i naplaćivanje troškova može zavisiti od toga radi li se o Eksternim korisnicima tokom Otvorenog pristupa i Komercijalnog vremena. Cjenovnik usluga za Eksterne korisnike u vremenu Otvorenog pristupa će biti formiran na osnovu stvarnih troškova nastalih tokom perioda istraživanja, uzimajući u obzir vrijeme korištenja opreme i ljudske resurse, potrošni materijal i ostale materijale potrebne za izvođenje poslova, te druge moguće troškove.
29. Nakon što se zaprili zahtjev eksternog Korisnika, te donese odluka da se odobri pristup, Rukovodilac laboratorija/Instituta priprema izračun troškova usluga.
30. Cjenovnik definisan u ovoj Politici se odnosi na Eksterne korisnike (Vrijeme otvorenog pristupa), dok je pristup internih Korisnika i komercijalnih Korisnika regulisan kroz akte organizacione jedinice.
31. Komercijalne cijene usluga **Istraživačke infrastrukture** su javno objavljene. Cijene se ažuriraju kako bi se uzele u obzir promjene u ekonomskim uvjetima, cijena održavanja, administracija i ostali troškovi vezani za korištenje **Istraživačke infrastrukture**.

## **POGLAVLJE 6 OBAVEZE VEZANE ZA POVJERLJIVOST PODATAKA I ZAŠТИTU INTELEKTUALNOG VLASNIŠTVA**

32. **Voditelj Istraživačke infrastrukture** (Rukovodilac laboratorija/Instituta) mora osigurati povjerljivost rezultata svakog naučnog istraživanja i/ili eksperimenta izvedenog korištenjem **Resursa Istraživačke infrastrukture** i/ili Usluga. Izuzetak može biti naznačen pismenim sporazumom između **Istraživačke infrastrukture** i eksternog **Korisnika**.
33. Vlasništvo i upravljanje intelektualnim vlasništvom nastalim na Univerzitetu u Bihaću i obaveze povjerljivosti su regulisane Zakonom o autorskim i srodnim pravima BiH (Službeni glasnik BiH, Br. 63/10)
34. U slučaju da istraživanje provodi eksterni **Korisnik**, svo intelektualno vlasništvo nastalo unutar **Vremena otvorenog pristupa** će se smatrati intelektualnim vlasništvom eksternog **Korisnika** ukoliko to nije drugačije određeno.
35. U slučaju da istraživanje provodi eksterni Korisnik tokom **Zagarantovanog** ili **Komercijalnog vremena**, pravo intelektualnog vlasništva će biti određeno posebnim sporazumom potpisanim samo za ovaj pristup.
36. U slučaju da istraživanje provodi interni **Korisnik**, postoji mogućnost potrebe održavanja rasprave o dostupnosti rezultata **Otvorenom pristupu**, u skladu sa principima Otvorene nauke.

## **POGLAVLJE 7 RJEŠAVANJE SPOROVA**

37. Ukoliko je Istraživačka infrastruktura ili jedan od njenih elemenata oštećen ili uništen, Univerzitet u Bihaću ima pravo da zahtjeva nadoknadu štete.
38. U slučaju spora u vezi upotrebe **Resursa Istraživake infrastrukture** ili pružanja usluga, kršenja zaštite intelektualnog vlasništva ili drugih osnova direktno vezanih za **Istraživačku infrastrukturu**, interesne stranke mogu uputiti pismeni zahtjev ili žalbu Senatu/Upravnom odboru Univerziteta.
39. Svaki zahtjev ili žalba se moraju uzeti u obzir i pregledati u roku od **[60]** kalendarskih dana od dana prijema. Odgovorna služba priprema odgovor i šalje ga podnosiocu u roku od **[7]** radnih dana.
40. U slučaju da se spor ne uspije riješiti, interesne stranke mogu zaštititi svoja prava procedurom u skladu sa pravnim odredbama države. Pogodena stranka ima na raspolaganju mogućnost pokretanja sudskog procesa pred sudom (podnošenje zahtjeva za zaštitu prava vlasništva), kojim procedura može biti okončana sudskom nagodbom ili sudskom odlukom (presudom). Ukoliko je spor nastao kao rezultat štete uzrokovane nepoštivanjem odredbi ugovora sa stranom komponentom, koristi se klauza ugovora o mirnom rješavanju spora, uključujući arbitražno rješavanje sporova.

## **POGLAVLJE 9 ZAVRŠNE ODREDBE**

41. Izmijenjene i dopune Politike donosi Senat Univerziteta.
42. Politika stupa na snagu danom donošenja.

Br.: 06-519-1/2021  
Bihać, 29. 1. 2021.

